

VRIJEDNOST UČENJA KUR'ANA

فضائل تلاوة القرآن الكريم

Ebu-Umame, r.a., prenosi da je čuo Allahova Poslanika, s.a.v.s., kad kaže: "Učite Kur'an, jer će on doći na Sudnjem danu da se zauzima (šefaat čini) za svoje učeće."

Osman b. 'Affan, r.a., prenosi da je Resulullah, s.a.v.s, rekao: "Najbolji među vama je onaj koji Kur'an nauči, a zatim njime druge podučava!"

Aiša, r.a., prenosi ove riječi Allahova Poslanika, s.a.v.s.: "Onaj ko vješto uči Kur'an, bit će u društvu s pisarima (melekima) časnim i čestitim, a ko ga uči zamuckujući i s poteškoćom, imat će dvostruku nagradu."

Ebu Musa el-Eš'ari, r.a., kaže da je Allahov Poslanik, s.a.v.s., rekao: "Vjernik koji uči Kur'an je kao narandža: ima lijep miris, a i okus mu je lijep; a vjernik koji ne uči Kur'an je kao hurma: nema mirisa, a okus mu je sladak. Munafik koji uči Kur'an je kao bosiljak: ima lijep miris, a okus mu je gorak; a munafik koji ne uči Kur'an je kao gorka tikvica: nema mirisa, a okus mu je gorak."

Omer b. el-Hattab, r.a., prenosi da je Vjerovjesnik, s.a.v.s., rekao: "Zaista, Allah ovom Knjigom (Kur'anom) uzdiže jedne narode, a ponižava druge."

Ibn-Mes'ud, r.a., prenosi da je Allahov Poslanik, s.a.v.s., rekao: "Ko prouči jedan harf - slovo iz Allahove Knjige (Kur'ana), imat će nagradu, a nagrada se deseterostruko uvećava. Ja ne kažem da je "Elif Lam - Mim" harf, nego "Elif" je harf, "Lam" je harf i "Mim" je harf."

Ibn-'Abbas, r.a., veli da je Resulullah, s.a.v.s., rekao: "Onaj u čijim grudima nema ništa iz Kur'ana (ne pamti ništa iz Kur'ana) je kao razvaljena i napuštena kuća."

'Abdullah b. 'Amr b. el-'As, r.a., prenosi da je Vjerovjesnik, s.a.v.s., rekao: "Učaču Kur'ana će na Sudnjem danu biti rečeno: 'Uči i penji se (dženetskim stepenicama - deredžama), uči lijepo i pravilno, kao što si i na dunjaluku učio, jer tvoje je mjesto (deredža u Džennetu) kod posljednjeg ajeta kojeg proučiš.'"

DUŽNOST JE ODRŽAVATI KUR'AN I NE PREPUSTITI GA ZABORAVU

Ebu-Musa, r.a prenosi da je Allahov Poslanik, s.a.v.s., rekao: "Brite se i čuvajte Kur'an (ono što ste naučili iz njega), jer tako mi Onoga u čijoj ruci je Muhammedova duša, on se zaboravlja brže nego što se deva sveze oslobodi." (konopa kojim joj je noga svezana).

LIJEPO JE DA SE KUR'AN UČI ULJEPŠANIM GLASOM

Ebu-Hurejre, r.a., prenosi od Resulullaha, s.a.v.s., da je rekao: "Allah ne sluša - na poklanja pažnju ničemu kao vjerovjesniku lijepa glasa, koji glasno i lijepo uči Kur'an."

PODSTICANJE NA UČENJE ODREĐENIH AJETA I SURA IZ KUR'ANA

Ebu-Se'id Rafi' b. Mu'alla, r.a., veli: "Allahov Poslanik, s.a.v.s, rekao mi je: 'Hoćeš li da te podučim najvećoj suri iz Kur'ana, prije nego što izađeš iz džamije?' Zatim me je uzeo za ruku, pa kad smo htjeli izaći, ja mu rekoh: 'O Allahov Poslaniče, rekao si da ćeš me podučiti najvrijednijoj suri iz Kur'ana?' - a on mi odgovori: 'Elhamdu lillah rabbil 'alemin (Fatiha) - to je sedam ajeta koji se ponavljaju ("Esseb'ul-mesani") i veličanstveni Kur'an koji mi je dan.'"

Ebu-Se'id el-Hudri, r.a., prenosi da je Allahov Poslanik, s.a.v.s., rekao za "Kulhuvellahu ehad": "Tako mi Onoga u čijoj je ruci moja duša, ona je ravno trećini Kur'ana!"

U jednom drugom predanju stoji da je Resulullah, s.a.v.s., rekao svojim ashabama: "Zar nije svaki od vas u stanju proučiti trećinu Kur'ana svake noći?" Pošto im je to izgledalo teško, oni rekoše: "A ko je to od nas u stanju, o Allahov Poslaniče?" A on im odgovori: "Kulhuvallahu ehad - to je trećina Kur'ana!"

Ebu-Se'id el-Hudri, r.a., pripovijeda: "Allahov Poslanik, s.a.v.s., tražio je utočište (kod Allaha) od džina i insanskog pogleda (uroka), sve dok mu nisu objavljene "mu'avvizetani" - Sura El-Felek i sura En-Nas, a kad su mu one objavljene, učio je njih, ostavivši sve ostalo."

Ebu-Hurejre, r.a., prenosi od Allahova Poslanika, s.a.v.s.: "Ne činite vaše kuće grobovima (ne učeći i ne klanjajući u njima), jer šejtan zaista bježi od kuće u kojoj se uči sura El-Bekare.

Ebu-Derda', r.a., pripovijeda da je Resulullah, s.a.v.s., rekao: "Ko nauči (napamet) deset ajeta s početka sure El-Kehf, bit će sačuvan od Dedžala."

U drugom predanju stoji: "...s kraja sure El-Kehf."

OKUPLJANJE RADI UČENJA I PROUČAVANJA KUR'ANA POHVALNO JE

Ebu-Hurejre, r.a., prenosi da je Allahov Poslanik, s.a.v.s., rekao: “Kad se ljudi okupe u jednoj od Allahovih kuća (džamija), da uče Allahovu Knjigu (Kur'an) i da je međusobno proučavaju, na njih se spusti mir, prekrije ih Allahova milost, okruže ih meleki i Allah ih spomene među onima koji su kod Njega.” (Muslim)